

Алексей Михайлович Татаринov – Удъурбай
Дьүрүһүтэр хомуһум

Дьоһус, кыра хомус тыаһа
Чараас тылын ылатара,
Дьикти дорһоон умсугута
Чаран күөһэр угуйара.
 Дьүрүһүтэр хомус даһа
 Күөрэгэйи көтүтэрэ,
 Дьырылата- дьурулата
 Күөх халлаанна уйдараара.
Дьүөрэ тылы хомус үөрэ
Кэһэ кылы чоргутара,
Дьылтан ордук тупсар кэми
Күөх сайыны уруйдуура.
 Дьөһөгөйү хомус дьүөрэ
 Туйахтарын тыаһатара,
 Дьоруо атын дьигиһитэ
 Толоон устун сиэллэрэрэ.
Дьиэрэнкэйдээн хомус кэрэ
Кыргыттары санатара,
Дьикти ырыа “кылы-кылы...”
Кыталыгы дайдарара.
 Дьону көрсө хомус этэ
 Оһуохайы таһаараара,
 Дьолуо күннэ ыһыах ыһа
 Ойуу- дьарһаа түһэрэрэ.
Дьабакалаах, симэхтэрдээх
Сахам мааны далбардара,
Дьоһун көрүн, хорсун- хоодуот,
Саарын дэтэр, эр бэртэрэ.
 Дьиэрэлдьитэн оһуохайдаан
 Сиэттиһэннэр киирбиттэрэ,
 Дьиэрэһитэн ыһыах ыһан
 Сирэм күөһхэ тийбиттэрэ.
Дьоһус, кыра хомус тыаһа
Умсугута угуйара,
Дьырылатар хомус тыла
Уйгу күнү уруйдуура.
30.11.2017

Татаринov , Алексей Михайлович – Удъурбай . Дьүрүһүтэр хомуһум... // Айар абылан аартыга : [хоһооннор]. / Алексей Михайлович Татаринov . – Дьокуускай : Дани – Алмас, 2018. – С. 107-108.